

水經注箋卷第三十八

漢 桑欽撰

後魏酈道元



明 李長庚訂

孫汝澄

朱謀埠箋

李克家全校

資水

漣水

湘水

灑水

溱水

資水出零陵都梁縣路山

資水出武陵郡無陽縣界唐糺山蓋路山之別名也謂之大谿水東北逕邵陵郡武岡縣南縣分都梁之所置也縣左右二岡對峙重岨齊秀間可二

水經注箋

卷三十八

里舊傳後漢伐五谿蠻蠻保此岡故曰武岡縣即其稱焉大谿逕建興縣南又逕都梁南漢武帝元朔五年以封長沙定王子敬侯定之邑也縣西有小山山上有淳水宋本作淳水既清且淺其中悉生蘭草綠葉紫莖芳風藻川蘭馨遠馥俗謂蘭為都梁山因以號縣受名焉

東北過夫夷縣

夫水出縣西南零陵縣界少延山東北流逕扶陽縣南本零陵之夫夷縣也漢武帝元朔五年以封長沙定王子敬侯義之邑也夫水又東注邵陵水

謂之邵陵浦口水也謝耳伯云當作浦水口

東北過邵陵縣之北

縣治郡下南臨大谿水逕其北謂之邵陵水魏咸熙二年吳寶鼎元年孫皓分零陵北部立邵陵郡於邵陵縣故邵陵也谿又東得高平水口水出武陵郡沅陵縣首望山西南流高平縣南又東入邵陵縣界南入于邵水邵水又東會雲泉水水出零陵永昌縣雲泉山西北流逕邵陵南縣故昭陽也孫云昭陽疑作昭陵按漢志長沙國有昭陵縣雲泉水又北注邵陵水謂之邵陽水口孫云當作邵陵自下東北出益陽縣其間

水經注箋 卷三十八 三一 三十七三 吉

逕流山峽名之為茱萸江蓋水變名也

又東北過益陽縣北

縣有關羽瀨所謂關侯灘也南對甘寧故壘昔關羽屯軍水北孫權令魯肅甘寧拒之於是水寧謂肅曰羽聞吾咳嗽之聲不敢渡也渡則成擒矣羽夜聞寧處分曰興霸聲也遂不渡茱萸江又東逕益陽縣北又謂之資水應劭曰縣在益水之陽今無益水亦或資水之殊日矣然此縣之左右處處有深潭漁者咸輕舟委浪謠詠相和羅君章所謂其聲綿邈者也水南十里有井數百口淺者四五

尺或三五丈深者亦不測其深古老相傳昔人以杖撞地輒便成井或云古人采金沙處莫詳其實也

又東與沅水合於湖中東北入于江也

湖卽洞庭湖也所入之處謂之益陽江口

漣水出漣道縣西資水之別

水出邵陵縣界南逕漣道縣縣故城在湘鄉縣西一百六十里控引衆流合成一谿東入衡陽湘鄉縣歷石魚山下多玄石山高八十餘丈廣十里石色黑而理若雲母開發一重輒有魚形鱗鱗首尾

水經注箋

卷三十八

三

三百五十一

宛若刻畫長數寸魚形備足燒之作魚膏腥因以

名之漣水又逕湘鄉縣南臨漣水本屬零陵長沙

定王子昌邑

孫按漢書王子侯表哀帝建平四年封長沙王子昌爲湘鄉侯疑非定王

也漣水又屈逕其縣東而入湘南縣也

東北過湘南縣南又東北至臨湘縣西南東入于湘

漣水自湘南縣東流至衡陽湘西縣界入于湘水

也於臨湘縣爲西南者矣

湘水出零陵始安縣陽海山

卽陽朔山也應劭曰湘出零陵山蓋山之殊名也

山在始安縣北縣故零陵之南部也魏咸熙二年

孫皓之甘露元年立始安郡湘灘同源分爲二水南爲灘水北則湘川東北流羅君章湘中記曰湘水之出於陽朔則觴爲之舟至洞庭日月若出入於其中也

東北過零陵縣東

越城嶠水南出越城之嶠嶠即五嶺之西嶺也秦置五嶺之戍是其一焉北至零陵縣下注湘水湘水又逕零陵縣南又東北逕觀陽與觀水合水出臨賀郡之謝沐縣界西北逕觀陽縣西縣蓋即水爲名也又西北流注于湘川謂之觀口也

水經注箋

卷三十八

四

三百六十一

又東北過洮陽縣東

洮水出縣西南大山東北逕其縣南即洮水以立稱矣漢武元朔五年封長沙定王子靖侯狗彘爲

侯國

舊本作洮陽侯狗按漢書表作狩燕而史記年表作狗彘忠史記譌也孫按索隱引漢表

作將燕

王莽更名之曰洮治也其水東流注于湘水

又東北過泉陵縣西

營水出營陽泠道縣南流山西流逕九疑山下磐

碁

磐碁碁疑誤當作蟠碁

蒼梧之野峰秀數郡之間羅巖九舉

各導一谿岫壑負岨異嶺同勢遊者疑焉故曰九疑山大舜窆其陽商均葬其陰山南有舜廟前有

石碑文字缺落不可復識自廟仰山極高直上可
百餘里古老相傳言未有登其峰者山之東北泠
道縣界又有舜廟縣南有舜碑碑是零陵太守徐
儉立營水又西逕營道縣馮水注之水出臨賀郡
馮乘縣東北馮岡其水導源西北流縣馮谿以託
名焉馮水帶約衆流渾成一川謂之北渚歷縣北
西至關下關下地名也是商州改裝之始馮水又
左合萌渚之水水南出于萌渚之嶠五嶺之第四
嶺也其山多錫亦謂之錫方矣渚水北逕馮乘縣
西而北注馮水馮水又逕營道縣而右會營水營

水又西北屈而逕營道縣西王莽之九疑亭也營
水又東北逕營浦縣南營陽郡治也魏咸熙二年
吳孫皓分零陵置在營水之陽故以名郡矣營水
又北都谿水注之水出舂陵縣北二十里仰山南
逕其縣西縣本泠道縣之舂陵鄉蓋因舂谿爲名
矣漢長沙定王分以爲縣武帝元朔五年封王中
子買爲舂陵節侯縣故城東又有一城東西相對
各方百步古老相傳言漢家舊城漢稱猶存知是
節侯故邑也城東角有一碑文字缺落不可復識
東南三十里尚有節侯廟都谿水又南逕新縣東

縣東傍都谿谿水又西逕縣南左與五谿俱會縣
有五山山有一谿五水會于谿門初學記引此注
作會于縣門

故曰都谿也都谿水自縣又西北流逕泠道縣北
與泠水合水南出九疑山北流逕其縣西南縣指

泠谿以即名王莽之泠陵縣也泠水又北流注於
都谿水又西北入于營水谿水又北流注于營陽

峽又北至觀陽縣而出於峽矣大小二峽之間為
泂泂之極艱矣營水又西北逕泉陵縣西漢武元

朔五年以封長沙定王子節侯賢之邑也王莽名
之曰溥潤孫云漢志
作溥潤零陵郡治故楚矣漢武帝元

水經注箋

卷三十八

鼎六年分桂陽置太史公曰舜葬九疑實惟零陵
或作零郡郡取名焉王莽之九疑郡也下邳陳球
為零陵太守桂陽賊胡蘭攻零陵激流灌城球輒
於內因地勢反決水淹賊相拒不能下後漢書陳
球字伯真

下邳人官侍御史時桂陽黠賊寇鈔荆部以球為
零陵太守賊虜消難而州兵朱蓋等反與桂陽賊
胡蘭轉攻零陵球弦大弓羽矛為矢引機發之遠
射千步多所殺傷賊復激流灌城球於內輒反決
水淹賊會中郎將度尚將
救兵至遂共斬破蓋等縣有白土鄉零陵先賢

傳曰鄭產字景載泉陵人也為白土晉夫宋本作
曹夫

漢末多事國用不足產子一歲輒出口錢民多不
舉子產乃勅民勿得殺子口錢當自代出產言其

郡縣爲表上言錢得除更名白土爲更生鄉也晉書地道志曰縣有香茅氣甚芬香言貢之以縮酒也營水又北流注于湘水湘水又東北與應水合水出邵陵縣歷山峩嶸嶮峻嶧嶧萬尋澄淵湛于下應水湧於上東南流逕應陽縣南晉分觀陽縣立蓋卽應水爲名也應水又東南流逕有鼻墟南王隱曰應陽縣本泉陽之北部東五里有鼻墟言象所封也山下有象廟言甚有靈能興雲雨余所聞也聖人之神曰靈賢人之精氣爲鬼象生不惠死靈何寄乎應水又東南流而注于湘水湘水又

水經注箋

卷三十八

東北得沱口水出永昌縣北羅山東南流逕石鸞山東其山有石糾而狀鸞因以名山其石或大或小若母子焉及其雷風相薄則石鸞羣飛頡頏如真鸞矣羅君章云今鸞不必復飛也其水又東南逕永昌縣南又東流注于湘水又東北逕祁陽縣南又有餘谿水注之水出西北邵陵郡邵陵縣東南流注于湘其水濁揚清汎濁水色兩分湘水又北與宜谿水合水出湘東郡之新寧縣西南新平

故縣東

宋書州郡志云湘東郡吳孫亮太平二年分長沙東部都尉立晉世七縣宋孝武大

元二一年省酃及新平但有臨

新平

孫云當故新平

也衆川瀉浪共成一津西北流東岍山下有龍穴
宜水逕其下天旱則擁水注之便有雨降宜水又
西北注于湘湘水又西北得舂水口水上承營陽
舂陵縣西北潭山又北逕新寧縣東又西北流注
于湘水也

又東北過重安縣東又東北過鄱縣西泰水從東南
來注之孫云泰水常作承水

承水出衡陽重安縣西邵陵縣界邪薑山東北流
至重安縣逕舜廟下廟在承水之陰又東合略塘
相傳云此塘中有銅神今猶時聞銅聲於水水輒

水經注箋

卷三十八

變淥作銅腥魚爲之死承水又東北逕重安縣南

漢長沙項王子虔邑也孫云王子虔漢表作鍾武節侯虔故零陵

之鍾武縣王莽更名曰鍾桓也武水入焉水出鍾

武縣西南表山東流至鍾武縣故城南而東北流

至重安縣注于承水至湘東臨承縣北漢地志承陽在承水

之陽故名讀若丞屬長沙國後漢志作丞陽屬零陵郡晉志宋志俱作丞陽屬湘東郡東注

于湘謂之承口臨承即故鄱縣也縣即湘東郡治

也郡舊治在湘水東故以名郡魏正元二年吳主

孫亮分長沙東部立縣有石鼓高六赤湘水所逕

鼓鳴則土有兵革之事羅君章云扣之聲聞數十

里此鼓今無復聲觀陽縣東有裴巖其下有石鼓形如覆船扣之清響遠徹其類也湘水北又歷印石石在衡水縣南江水又有盤石或大或小臨水而石悉有跡其方如印纍然行列無文字如此可二里許因名爲印石也湘水又北逕衡山縣東山在西南有三峰一名紫蓋一名容峰容峰最爲竦傑自遠望之蒼蒼隱天故羅含云望若陣雲非清霽素朝不見其峰丹水湧其左澧泉流其右山經謂之响巉山爲南嶽也山下有舜廟南有祝融冢楚靈王之世山崩毀其墳得營丘九頭圖治洪水

水經注箋

卷三十八

九

四百一十一

血馬祭山得金簡玉字之書容峰之東有仙人石室學者經過往往聞諷誦之音矣衡山東南二面臨映湘川自長沙至此江湘七百里中有九背故

漁者歌曰帆隨湘轉望衡九面

羅含湘中記云衡山九嶷皆有舜廟

遙望衡山如陣雲沿湘千里九向九背乃不復見
肆按此注所引漁歌九面正與轉字相叶即羅含九向之義宋本自誤作九回耳 山上有飛泉下注下映青林直注

山下望之若幅練在山矣湘水又東北逕湘南縣東又歷湘西縣南分湘南置也衡陽郡治魏正元二年吳孫亮分長沙西部立治湘南太守何承天徙郡湘西矣十三州志曰日華水出桂陽郴縣華

山西至湘南縣入湘地理志曰郴縣有來水出來
山西至湘南西入湘漢地理志郴縣耒山耒水所出西至湘南入湖湘水
又北逕麓山東其山東臨湘川西傍原隰息心之士多所萃焉

又東北過陰山縣西沘水從東南來注之又北過澧陵縣西澧水從東注之

續漢書五行志曰建安八年長沙醴陵縣有大山常鳴如牛吼聲宋本作如鳴聲積數年後豫章賊攻沒縣

亭殺掠吏民因以為候湘水又北逕建寧縣而傍湘水縣北有空冷峽驚浪雷奔濬同三峽湘水又

水經注箋

卷三十八

十

北逕建寧縣故城下晉太始中立

又北過臨湘縣西瀏水從縣西北流注之

縣南有石潭山湘水逕其西山有石室石牀臨對清流水又北逕昭山西山下有旋泉深不可測故

言昭潭無底也亦謂之曰湘州潭湘水又北逕南

津城西西對橘洲或作吉字為南津洲尾水西有

橘洲子戍

孫云疑作橘子洲戍

故郭尚存湘水又北左會瓦

官水口湘浦也又逕船官西湘州商舟之所次也

北對長沙郡郡在水東州城南舊治在城中後乃

移此湘水左逕麓山東上有故城山北有白露水

口湘浦也又右逕臨湘縣故城西縣治湘水濱臨川側故卽名焉王莽改號撫陸故南境之地也秦滅楚以當作長沙郡卽青陽之地也秦始皇二十六年荆王獻青陽以西漢書鄒陽傳越水長沙還舟青陽注張晏曰青陽地名也蘇林曰青陽長沙縣也漢高祖五年以封吳芮爲長沙王是城卽芮築也漢景帝二年封唐姬子發爲王都此王莽之鎮蠻郡也於禹貢則荆州之域晉懷帝以永嘉元年分荆州湘中諸郡立湘州治此城之內郡解西陶侃廟云舊是賈誼宅地中有一井是誼所鑿極

小而深上斂下大其狀似壺傍有一腳石牀纔容一人坐形流俗相承云誼宿所坐牀又有大楫樹亦云誼所植也城之西北有故市北對臨湘縣之新治縣治西北有北津城縣北有吳芮冢廣踰六十八丈登臨寫目爲廛郭之佳憩也郭頌世語云魏黃初末吳人發芮冢取木於縣立孫堅廟見芮尸容貌衣服並如故吳平後預發冢人於壽春見南蠻校尉吳綱曰君形貌何類長沙王吳芮乎但君微短耳綱瞿然曰是先祖也自芮卒至冢發四百年至見綱又四十餘年矣湘水左合誓口又北

得石榔口並湘浦也右合麻溪水口湘浦也湘水
又北逕三石山東山枕側湘川北卽三石水口也
湘浦矣水北有三石戍戍城爲二水之會也湘水
又逕瀏口戍西北對瀏水

又北瀉水從西南來注之

瀉水出益陽縣馬頭山東逕新陽縣南晉太康元
年改曰新康矣瀉水又東入臨湘縣歷瀉口戍東
南注湘水湘水又北合斷口又北則下營口湘浦
也湘水又宋本作之左岸有高口水出益陽縣西北逕
高口戍南又西北上鼻水自鼻洲上口受湘西入

水經注箋

卷三十八

十三

七百六十一

焉謂之上鼻浦高水南北與下鼻浦合水自鼻洲
下口首受湘川西通高水謂之下鼻口高水又西
北右屈爲陵子潭東北流注湘爲陵子口湘水自
高口戍東又北右會鼻洲左合上鼻口又鼻宋本作北
右對下鼻口又北得陵子口湘水右岸銅官浦出
焉湘水又北逕銅官山西臨湘水山土紫色內含
雲母故亦謂之雲母山也

又北過羅縣西瀆水從東來流注之

湘水又北逕錫口戍東又北左派謂之錫水西北
流逕錫口戍北又西北流屈而東北注玉水焉水

出西北玉池東南流注于錫浦謂之玉池口錫水
又東北東湖水注之水上承玉池之東湖也南流
于錫謂之三陽逕水南有三戍又東北注于湘湘
水自錫口北出又得望屯浦湘浦也湘水又北津
北謂之門逕也湘水紆流西北東北合門水謂之
門逕口又北得三谿水口水東承太湖西通湘浦
三水之會故得三谿之目耳又北東會大對水口
西接三津逕湘水又北逕黃陵亭西又合黃陵水
口其水上承太湖湖水西流逕二妃廟南世謂之
黃陵廟也言大舜之陟方也二妃從征溺于湘江

水經注箋

卷三十八

三

四百五十一

志

神遊洞庭之淵出入瀟湘之浦瀟者水清深也湘
中記曰湘川清照五六丈下見底石如樗蒲矣五
色鮮明白沙如霜雪赤崖若朝霞是納瀟湘之石

矣

謝云石當作名

故名

宋本

爲立祠於水側焉荊州牧劉

表刊石立碑樹之於廟以旌不朽之傳矣黃水又
西流入于湘謂之黃陵口昔王子山有異才年二
十而得惡夢作夢賦二十一溺死于湘浦卽斯川

矣

張華博物志云王子山與父叔師到泰山從鮑子真學筭筭到魯賦靈光殿歸渡湘水溺死王交

考名延壽一字子山也南郡宜城人子山夢賦序曰臣弱冠嘗夜寢見鬼物與臣戰遂得東方朔與臣作罵鬼之書臣遂作賦一篇叙夢後人夢者讀誦以却鬼數數有驗臣不敢蔽其詞具古文苑中

湘水又北逕自宋本沙戍西又北右會東町口澗

水也湘水又左合決湖口水出西陂東通湘渚湘

水又北汨水注之水東出豫章艾縣相山西南逕

吳昌縣北與純水合水源出其縣東南純山西北

流又東逕其縣南又北逕其縣故城下縣是吳主

孫權立純水又右會汨水汨水又西逕羅縣北本

羅子國也故在襄陽宜城縣西楚文王移之於此

秦長沙立郡因以為郡克家云郡疑作縣謂之羅水汨水

又西逕玉笥山羅含湘中記云屈潭之左有玉笥

山道士遺言此福地也一曰地腳山汨水又西為

水經注箋 卷三十八 十四

屈潭即羅淵也屈原懷沙自沈於此故淵潭以屈

為名魏烈湘中記云屈潭之左玉笥山屈平之放棹於此山而作九歌焉昔賈誼史

遷皆嘗逕此弭楫江波投弔於淵淵北有屈原廟

廟前有碑又有漢南太守程堅碑寄在原廟汨水

又西逕汨羅戍南西流注于湘春秋之羅汨矣世

謂汨羅口湘水又北枝分北出逕汨羅戍西又北

逕壘石山東又北逕壘石戍西謂之苟導逕矣而

北合湘水自汨口而宋本作西北逕壘石山西而北對

青草湖亦或謂之為青草山也西對懸城口湘水

又北得九口並湘浦也湘水又東北為青草湖口

右合宋本作會苟逕北口與勞口合又北得同拌口皆湘浦右迤者也

又北過下雋縣西微水從東來流注之

湘水左會水青口資水也世謂之益陽江湘水左逕鹿角山東右逕謹亭戍西又北合查浦又北得萬浦咸湘浦也側湘浦北有萬石戍湘水左則沅水注之謂之橫房口東對微湖世或謂之麋湖口也右屬微水即經所謂微水經下雋者也西流注于江謂之麋湖口也水又北逕金浦戍北帶金浦水湖澹也湘水左則澧水注之世謂之武陵江凡

水經注箋

卷三十八

十五

三五五

此四水同注洞庭北北會大江名之五渚戰國策曰秦與荆戰大破之取洞庭五渚也湖水廣圓五百餘里日月若出沒于其中山海經云洞庭之山帝之二女居焉沅澧之風交湘之浦出入多飄風

暴雨

中山經云洞庭之山帝之二女居之是常遊于江淵澧沅之風交瀟湘之淵是在九江之

間出入必以飄風暴雨

湖中有君山編山君山有石穴潛通

吳之包山郭景純所謂巴陵地道者也是山湘君之所遊處故曰君山矣昔秦始皇遭風於此而問其故博士曰湘君出入則多風秦王乃赭其山漢武帝亦登之射蛟於是山東北對編山山多篔簹竹

兩山相次去數十里迴峙相望孤影若浮湖之右岸有山世謂之笛鳥頭石石北右會翁湖口水上承翁湖左合洞浦所謂三苗之國左洞庭者也又北至巴丘山入于江

山在湘水右岸山有巴陵故城本吳之巴丘邸閣城也晉太康元年立巴陵縣於此後置建昌郡宋元嘉十六年立巴陵郡城跨岡嶺濱岨三江巴陵西對長洲其洲南麀湘浦北對大江故曰三江也三水所會亦或謂之三江口矣夾山列關謂之射獵又北對養口咸湘浦也水色青異當作黑東北入

水經注箋

卷三十八

十六

良
三百六十八

于大江有清濁之別謂之江會也

灘水亦出陽海山

灘水與湘水出一山而分源也湘灘之間陸地廣百餘步謂之始安嶠嶠卽越城嶠也嶠水自嶠之陽南流注灘名曰始安水故庾仲初之賦揚都云判五嶺而分流者也灘水又南與瀉水合出西北邵陵縣界而東南流至零陵縣西南逕越城西建安十六年交州刺史賴恭自廣信合兵小零陵越城迎步隲卽是地也瀉水又東南流注于灘水漢書所謂出零陵下灘水者也灘水又南合彈丸谿

水出于彈丸山山有湧泉奔流衝激山岨

舊本作山岨六

朝詩賦中多用岨字

及谿中有石若丸自然珠圓狀彈丸矣

故山水即名焉漢水

孫云當作溪水謂彈丸谿水

東流注于瀕

水瀕水又南逕始興縣東魏文帝咸熙二年吳孫

皓分零陵南部立始興縣瀕水又南右會洛谿谿

水出永豐縣西北洛谿山東流逕其縣北縣本蒼

梧之北鄉孫皓割以為縣洛谿水又東南逕始安

縣而東注瀕水瀕水又東南流入熙平縣逕羊瀨

山山臨水石間有色

孫云當作有石

類羊又東南逕雞瀨

山山帶瀕水山石色狀雞故二山以物象受名矣

水經注

卷三十八

瀕水又南得熙平水口水源出縣東龍山西南流

逕其縣南又西與北鄉谿水合水出縣東北北鄉

山西流逕其縣北又西流南轉逕其縣西縣本始

安之扶鄉也孫皓割以為縣谿水又南注熙平熙

平水又西注于瀕水縣南有朝夕塘水出西南塘

水從山下注塘一日再增再減盈縮以時未嘗愆

期同於潮水因名此潭為朝夕塘矣瀕水又西逕

平樂縣界左合平樂谿口水出臨賀郡之謝沐縣

南歷山西北流逕謝沐縣西南西南流至平縣

孫云

當作平樂縣

東南左會謝沐衆谿派流湊合西逕平樂

南孫皓割蒼梧之境立以為縣北隸始安谿水又西南流注於灘水謂之平水

南過蒼梧荔浦縣

瀨水出縣西北魯山之東逕其縣西與濡水合出永豐縣西北濡山東南逕其縣西又東南流入于荔浦縣注於瀨谿又注于灘水之上有灘水關灘水又南左合靈谿水口出臨賀富川縣北符靈岡南流逕其縣東又南注于灘水也又南至廣信縣入于鬱水

溱水出桂陽臨武縣南繞城西北屈東流

水經注箋

卷三十八

十八

三百七十

溱水導源縣西南北流逕縣西而北與武谿合山海經曰肆水出臨武西南注于海入番禺西肆水蓋溱水之別名也武谿水出臨武縣西北桐柏山東南流右合溱水亂流東南逕臨武縣西謂之武谿縣側臨谿東因曰臨武縣王莽更名大武也谿之宋本東南流左會黃泠谿水谿水出郴縣黃泠山西南流又宋本合武谿武水又南入里山山名藍豪廣圓五百里悉曲江縣界崖當有壁字峻咀巖嶺干天交柯雲蔚霾天晦景謂之瀧中孫云瀧音雙懸湍迴注崩浪震山名之瀧水

東至湘江縣安甯邑東屈西南流

瀧水又南出峽謂之瀧口西岸有任將軍城南海

都尉任囂所築也囂死尉他自龍州孫云當作龍川漢地志南

海郡有龍川縣始居之東岸有任將軍廟瀧水又南合泠

水泠水東出泠君山山羣峰之孤秀也晉太元十

八年崩千餘丈於是懸澗瀑挂傾流注壑頽波所

入灌於瀧水瀧水右合林水林水出縣東北洄山

王歆始興記曰林水源裏有室室前磐石上列羅

十瓮中悉是餅銀采伐遇之不得取取必迷悶晉

太元初民封驅之家僕密竊三餅歸發看有大蛇

水經注箋

卷三十八

十九

三十一

螿之而死湘州記曰其夜駟之夢神語曰君奴不

謹盜銀三餅即日顯戮以銀相備視則奴死銀在

矣林水自源西流于瀧水又與雲水合水出縣北

湯泉泉源沸湧浩氣雲浮以腥物投之俄頃即熱

其中時有細赤魚游之不為灼也西北合瀧水又

有藉水上承滄海水有島嶼焉其水吐納衆流西

北注于瀧水瀧水又南歷靈鷲山山本名虎郡山

疑作虎亦曰虎市山以虎多暴故也晉義熙中沙

門釋僧律葺宇巖阿猛虎遠跡蓋律仁感所致因

改曰靈鷲山瀧水又南逕曲江縣東又言縣皆號

曲江曲山名也東連岡是矣瀧中有碑文曰按地

理志曲江舊縣也王莽以為除虜始興郡治魏文

帝咸熙二年孫皓分桂陽南部立縣東傍瀧谿號

曰北瀧水水左即東谿口也水出始興東江州南

康縣界石閣山西流而與連水合水出南康縣涼

焚山連谿山即大庾嶺也五嶺之最東矣故曰東

嶠山斯則改裝之次其下船路名漣谿漣水南流

注于東谿謂之漣庾仲初謂之大庾嶠水也東谿

亦名東江又曰始興水又西邪階水注之水出縣

東南邪階山水有別源曰巢頭重嶺矜瀧湍奔相

屬祖源一作祖源雙注合為一川水側有鼻天子城鼻

天子所未聞也幽明錄始興有鼻天子冢又有鼻

部東五里有鼻墟象所封也埤按山海經堯子丹

朱亦自稱帝丹朱知象卦有鼻亦應僭稱鼻天子

矣故路史謂鼻天子即象也邪階水又西北注于東江江水又

西逕始興縣南又西入曲江縣即水注之水出浮

嶽山山躡一處則百餘步動若在水也因名浮嶽

山南流注于東江東江又西與利水合水出縣之

韶石北山南流逕韶石下其一作石高百仞廣圓五

里兩石對峙相去一里小大畧均似雙闕名曰韶石古老言昔有二仙分而憩之自爾年豐彌歷一

紀利水又南逕靈石下靈石一名逃石高三十丈

廣圓五百丈者舊傳言石本桂陽武城縣兩漢地志桂陽

郡但有臨武而無武城疑字誤也因夜迅雷之變忽然遷此彼人

來見歎曰石乃逃來因名逃石以其有靈運徙又

曰靈石其傑處臨江壁立霞駁有若續焉水石驚

瀨傳響不絕商舟淹留聆翫不已利水南注東江

東江又西注於北江謂之東江口溱水自此有始

興大江之名而南入澧陽縣也

過澧陽縣出淮浦關與桂水合漢地理志澧陽縣屬桂陽郡

溱水南逕澧陽縣西舊益縣也王莽之基武矣縣

水經注箋 卷三十八

東有澧石山廣圓三十里挺嶠大江之北盤陟長

川之際其陽有石室漁叟所憩昔欲於山北開達

郡之路輒有大蛇斷道不果是以今行者宋本舊本俱作

今者吳本增一行字必於石室前汎舟而濟也溱水又西南

歷臯口太尉二山之間是曰澧陽峽兩岸傑秀壁

立虧天昔嘗鑿石架閣令兩岸相接以拒徐道覆

晉書曰盧循徐道覆聞劉裕北伐循自始興寇長沙道覆寇南康廬陵豫章皆陷之進逼建康劉裕

遣將軍孫處沈田子自海道襲番禺拔之裕及循戰及大雷大破之循南走番禺道覆走保始興裕遣將軍劉藩克始興

詩道覆循亦自殺溱水出峽左則澧水注之水

出南海龍川縣西逕澧陽縣南右注溱水故應劭

曰澗水西入溱是也溱水又西南注水入焉

孫云注水

當作淮水漢志南海郡中宿縣有淮浦

山海經所謂淮水出桂陽西

北東南注肆入郭浦西者也溱水又西南逕中宿

縣會一里水其處隘名之為觀岐連山交枕絕岸

一作崖

壁竦下有神廟背阿面流壇宇虛肅廟渚攢

石巉巖亂峙中川時水洊至鼓怒沸騰流木淪沒

必無出者世人以為河伯下林

當作材

晉中朝時縣

人有使者至洛事訖將還忽有一人寄其書云吾

家在觀前石間懸藤即其處也但扣藤自當有人

取之使者謹依其言果有二人出外取書并延入

水經注箋

卷三十八

三十一

水府衣不霑濡言此似不近情然造化之中無所

不有稊滿西遊與河宗論實以此推之亦為類矣

溱水又西南逕中宿縣南吳孫皓分四會之北鄉

立焉

南入于海

溱水又南注于鬱而入于海

水經注箋卷第二十八